

漢魏六朝百三家集

魏

第二十六冊

阮步兵

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

1126

西華集

UNIVERSITY OF TORONTO
LIBRARY

UNIVERSITY OF TORONTO
LIBRARY

阮步兵集

阮步兵集題辭

嗣宗論樂史遷不如通易達莊則王
弼郭象二註皆其環內也以此三論
垂諸藝文六家指要網羅精潤曹氏
父子詞壇虎步論文有餘言理不足
嗣宗視之猶輕塵於泰岱豈特其人

禪蟲哉諸賦大言小言清風穆如間
覽賦苑長篇爭麗兩京三都讀未終
卷觸屏欲睡展觀阮作則一丸消疹
胸懷盪滌惡可謂世無萱草也晉王
九錫公卿勸進嗣宗製詞婉而善諷
司馬氏孤雛人主豺聲震怒亦無所

加正言感人尚愈寺人孟子之詩乎
詠懷諸篇文隱指遠定哀之際多微
辭蓋斯類也履朝右而談方外羈仕
宦而慕真仙大人先生一傳甯子虛
亡是公耶步兵厨人可以索酒鄰家
當鑪可以醉臥哭兵家之亡女慟窮

途之車跡處魏晉間如是足矣叔夜
日與酣飲而文王復稱至慎人與文
皆以天全者哉

婁東張溥題

阮步兵集目錄

賦

東平賦

元父賦

首陽山賦

清思賦

獼猴賦

鳩賦

牋

爲鄭冲勸晉王濺

奏記

辭蔣太尉辟命奏記

又

書

與晉王薦盧播書

答伏羲書

論

樂論

通易論

達莊論

通老論

傳

大人先生傳

贊

老子贊

誄

孔子誄

文

吊某公文

帖

搏赤猿帖

詩

詠懷詩三首

詠懷八十二首

采薪者歌

大人先生歌

附錄

本傳

阮步兵集目錄終

阮步兵集

目錄

三

陽明先生年譜

陽明先生全集

陽明先生集

陽明先生集

陽明先生集

陽明先生集

陽明先生集

陽明先生集

陽明先生集

阮步兵集卷全

魏陳畱阮籍著

明太倉張溥評

賦

東平賦

夫九州有方圓。九野有形勢。區域高下。物有其制。開之則通。塞之則否。流之則行。壅之則止。崇之則成邱陵。汗之則爲藪澤。逶迤漫衍。繞以大壑。及至分之國邑。樹之表物。四時儀其象。陰陽

暢其氣。傍通迴盪。有形有德。雲升雷動。一叫一
默。或由之安。乃用斯惑。若觀夫隅隈之缺。幽荒
之塗。沕漠之域。窮野之都。奇偉譎詭。可以勝圖。
乃有徧遊之士。浩養之雅。凌驚飈。躡浮霄。清濁
俱逝。吉凶相招。是以伶倫遊鳳於崑崙之陽。鄒
子喻溫於黍谷之陰。伯高登降於尚季之上。羨
門逍遙於三山之岑。上遨玄圃。下遊鄧林。鳳鳥
自歌。翔鸞自舞。嘉穀蕃殖。匪我稷黍。其阨陋則
有橫術之場。鹿豕之墟。匪脩潔之攸麗。於穢累

之所如。西則首仰阿甄。傍通戚蒲。桑間濮上。淫
荒所廬。三晉縱橫。鄭衛紛敷。豪俊凌屬。徒屬暫
居。是以強禦橫於戶牖。怨毒奮於牀隅。仍渺欲
而作慝。豈待久而發。諸士惟中。劉王是聚。高危
臨城。窮川帶宇。叔氏婚族。實在其湄。背險向水。
垢汙多私。是以其州間鄙邑。莫言或非。殫情戾
慮。以殖厥資。其土田則原壤蕪荒。樹藝失時。疇
畝不辟。荆棘不治。流潢餘塘。洋溢靡之。東當三
齊。西接鄒魯。長塗千里。受茲商旅。力間爲率。師

使以輔。驕僕織邑。於焉斯處。川澤捷徑。洞庭荆
楚。遣風過焉。是徑是宇。由而紹俗。靡則靡觀。非
夷罔式。導斯作殘。是以其唱和矜勢。背理向姦。
尚氣逐利。因畏惟愆。其居處壅翳蔽塞。窈邃弗
章。倚以陵墓。帶以曲房。是故居之則心昏。言之
則志哀。悸罔徙易。靡所寤懷。其外有濁河縈其
塘。清濟盪其樊。其北有連岡。崦嵫崎嶇。山陵崔
巍。雲電相干。長風振厲。蕭條太原。其南則浮汶
湛湛。行潦成池。深林茂樹。蓊鬱參差。羣鳥翔天。

百獸交馳。雖黔首之不淑兮。儻山澤之足彌。古
哲人之攸貴兮。好政教之有儀。彼玄真之所寶
兮。樂寂寞之無知。咨閭閻之散感兮。因回風以
揚聲。瞻荒榛之蕪穢兮。顧東山之葱青。甘邱里
之舊言兮。發新詩以慰情。信嚴霜之未滋兮。豈
丹木之再榮。北門悲於殷憂兮。小弁哀於獨誠。
鷗端一而慕仁兮。何淳朴之靡逞。彼羽儀之感
志兮。矧伊人之匪靈。時愀悃以遙思兮。飈飄颻
以欲歸。欽丕遊於陵顛兮。舉斯羣而競飛。物脩

化而神樂兮。甯遐觀之可追。乘松舟以載險兮。
雖無維而自繫。騁驂驪於狹路兮。顧蹇驢而弗
及。資章甫以遊越兮。見犀光而先入。被文繡而
賈戎兮。識旃裘之必襲。奉淳德之平和兮。孰斯
邦之可集。將言歸於美俗兮。請王子與俱遊。漱
玉液之滋怡兮。飲白水之清流。遂虛心而後已
兮。又何懷乎患憂。重曰。嘉年時之淑清兮。美春
陽以肇夏。託思颺而載行兮。因形骸以成駕。遵
間維而長驅兮。問迷罔於菀風。玄雲興而四周。

兮寒雨淪而下降。忽一寤而喪軌兮。蹈空虛而
遂征。扶搖蔽於合墟兮。咸池照乎增城。欣煌熠
之朝顯兮。喜太陽之炎精。測虛舟以遑思兮。聊
逍遙於清溟。謹玄真之謚訓兮。想至人之有形。
繡靡覩其紛錯兮。慮彌遠而度逼。竝旋軫於畎
澮兮。若空桑之可卽。言淫衍而莫止兮。心綿綿
而未息。集舒誥以鑒戒兮。賜衆誨之難測。神遙
遙以杼歸兮。畏雙環之在側。咨禽鳥之不羣兮。
悼悠悠之無極。感藜藿之易脩兮。攝左右之相

譽○懼○從○風○而○永○去○兮○託○顓○頊○於○鮒○隅○雖○琴○瑟○之○
畢○存○兮○豈○聲○曲○之○復○舒○慮○遨○遊○以○覲○奇○兮○彼○上○
騰○其○焉○如○紛○晻○曖○以○亂○錯○兮○漫○浩○漾○而○未○靜○理○
都○繆○而○改○據○兮○竦○端○委○而○自○整○制○規○矩○以○儀○衡○
兮○占○我○龜○以○觀○省○眺○茲○輿○之○所○徹○兮○寔○斯○近○而○
匪○遠○豈○三○年○之○無○問○兮○將○一○往○而○九○反○顧○果○日○
之○初○開○兮○馳○曲○陵○而○飾○容○時○零○落○之○飄○颻○兮○試○
枯○苑○之○必○從○釋○遼○遙○之○闊○度○兮○習○約○結○之○常○契○
巡○襄○城○之○閒○收○兮○誦○純○一○之○遺○誓○被○風○雨○之○沾○

濡兮安敢軒翥而遊。署竊悄悄之眷貞兮。泰恬
淡而永世。豈淹留以爲感兮。將易貌乎殊方。乃
擇高以登棲兮。永欣欣而樂康。

清遙古雅。有楚騷之遺。則凡賦中仍沓鋪張
薰蒸蹇澀諸習。皆洗濯盡去。

元父賦

吾嘗遊元父。登其城。使人愁思作賦以記之。言
不足樂也。

元父者。九州之窮地。先代之幽墟者也。故其城

郭卑小局促。危隘不遐。其土田則汗除漸淤。泥
涇槃沔。方池邊屬兮。容水滂沱。穢菜惟產兮。不
食實多。地下沉陰兮。受氣匪和。太陽不周兮。殖
物靡嘉。故其人民頑嚚。檣杌下愚。難化。其區域
壅絕斷塞。分迫旋淵。終始同貫。本末相牽。疇昔
訖今。曠世歷年。鉅野瀦其後。窮濟盡其前。眵澹
不暢。垢濁寔臻。不肖羣聚。屋空無賢。故其民放
散。肴亂。藪竄澤居。比跡麋鹿。齊志豪彊。是以其
原壤不辟。樹藝希疏。莧葦彌臯。蚊蚋慘膚也。於

其遠險則右金鄉而左高平。崇陵崔巍。深溪崢嶸。美類不處。熊虎是生。故人民被害。嚼齧禽性。獸情爾之。近阻則鳴鳩。廕其前。曲城發其後。鴟梟羣翔。狐狸萬口。故其人民。狼風豺氣。蟄電無厚。南望春申。東瞻孟嘗。表界薛邑。境邊山陽。逆旅行舍。姦盜所藏。非臨平陸。齊之西封。捷徑燕趙。逃遯逍遙。故其人民。側匿頗僻。隱蔽不公。懷私抱詐。爽慝是從。禮義不設。淳化匪同。先哲遺言。有昭有聳。如何君子。棲遲斯邦。

首陽山賦

正元元年秋余尚爲中郎在大將軍府獨往南牆下北首陽山賦曰。

在茲年之末歲兮。端旬首而重陰。風飄回以曲。至今雨旋轉而纖襟。蟋蟀鳴乎東房兮。鵙鵙號乎西林。時將暮而無儔兮。慮悽愴而感心。振沙衣而出門兮。纓委絕而靡尋。步徙倚以遙思兮。喟歎息而微吟。將脩飭而欲往兮。衆齟齬而笑人。靜寂寞而獨立兮。亮孤植而靡因。懷分索之。

情一兮穢羣僞之射真信可實而弗離兮甯高
舉而自儉聊仰首以廣頰兮瞻首陽之岡岑樹
叢茂以傾倚兮紛蕭爽而揚音下崎嶇而無薄
兮上洞徹而無依鳳翔過而不集兮鳴梟羣而
竝棲颺遙逝而遠去兮二老窮而來歸寔囚軋
而處斯兮焉暇豫而敢誹嘉粟屏而不存兮故
甘死而採薇彼背殷而從昌兮投危敗而弗遲
此進而不合兮又何稱乎仁義肆壽夭而弗豫
兮競毀譽以爲度察前載之是云兮何美論之

足慕苟道求之在細兮。焉子誕而多辭。且清虛以守神兮。豈慷慨而言之。

清思賦

余以爲形之可見。非色之美。音之可聞。非聲之善。昔黃帝登僊於荆山之上。振咸池於南之岡。鬼神其幽。而夔牙不聞其章。女娃耀榮於東海之濱。而翩翻於洪西之旁。林石之隕。從而瑤臺不照其光。是以微妙無形。寂寞無聽。然後乃可以覩窈窕而淑清。故白日麗光。則季后不步。

其容鐘鼓間鈴則延子不揚其聲夫清虛寥廓
則神物來集飄飄恍忽則洞幽貫冥冰心玉質
則皦潔思存恬澹無慾則秦志適情伊哀慮之
迺好兮又焉處而靡逞寒風邁於黍穀兮誨子
而遊鵲申孺悲而母歸兮吳鴻哀而象生茲感
激以達神豈浩漭而弗營志不覬而神正心不
蕩而自誠固秉一而內脩堪粵止之匪傾惟清
朝而夕晏兮指濛汜以永寧是時羲和旣頽玄
夜始屆望舒整轡素風來征輕帷連颺華裯肅

清彭蚌微吟。螻蛄徐鳴。望南山之崔巍兮。顧北
林之葱菁。太陰潛乎後房兮。明月耀乎前庭。迺
申展而缺寐兮。忽一悟而自驚焉。長靈以遂寂
兮。將有歛乎所之。意流盪而改慮兮。心震動而
有思。若有來而可接兮。若有去而不辭。心恍忽
而失度。情散越而靡治。豈覺察而明真兮。誠雲
夢其如茲。驚奇聲之異造兮。鑑殊色之在斯。開
丹山之琴瑟兮。聆崇陵之參差。始徐唱而微響
兮。情悄慧以蜚螭。遂招雲以致氣兮。乃振動而

大駭聲颺颺以洋洋若登崑崙而臨西海超遙
茫渺不能究其所在心漾漾而無所終薄兮思
悠悠而未半鄧林殪於大澤兮欽邳悲於瑤岍
徘徊夷由兮倚靡廣衍遊平圃以長望兮乘脩
水之華旂長思肅以永至今滌平衢之大夷循
路曠以徑通兮辟閨闥而洞闡羨要眇之飄遊
兮倚東風以揚暉沐洧淵以淑密兮體清潔而
靡譏厭白玉以爲面兮披丹霞以爲衣襲九英
之曜精兮珮瑤光以發微服儵煜以繽紛兮綰

衆采以相綏，色熠熠以流爛兮。紛雜錯以葳蕤，
象朝雲之一合兮。似變化之相依，麾常儀使先
好兮。命河女以胥歸步，容與而特進兮。盼兩楹
而升墀，振瑤谿而鳴玉兮。播陵陽之萋萋，蹈消
溪之危跡兮。躡離散之輕微，釋安朝之朱履兮。
踐席假而集帷，敷斯來之在室兮。乃飄忽之所
晞，馨香發而外揚兮。媚顏灼以顯姿，清言竊其
如蘭兮。辭婉婉而靡違，託精靈之運會兮。浮日
月之餘暉，假淳氣之精微兮。幸備嬿以自私，願

申愛於今夕兮尚有訪乎是非被芬芳之夕暢
兮將暫往而永歸觀悅懌而未靜兮言未究而
心悲嗟雲霓之可憑兮翻揮翼而俱飛棄中堂
之局促兮遺戶牖之不處帷幕張而靡御兮几
筵設而莫拊載雲輿之奄靄兮乘夏后之兩龍
折丹木以蔽陽兮竦芝蓋之三重翩翼翼以左
右兮紛悠悠以容容瞻朝霞之相承兮似美人
之懷憂采色雜以成文兮忽離散而不畱若將
言之未發兮又氣變而飄浮若垂髦而失鬣兮

節未集而形消。目流盼而自別兮。心欲來而貌
遼。紛綺靡而未盡兮。先烈宿之規矩。時儻莽而
陰暄兮。忽不識乎舊宇。邁黃妖之崇臺兮。雷師
奮而下雨。內英哲與長年兮。咎離倫與膺賈。摧
魍魎而折鬼神兮。直徑登乎所期。歷四方而縱
懷兮。誰云顧乎或疑。超高躍而疾驚兮。至北極
而放之援。間維以相示兮。臨寒門而長辭。旣不
以萬物累心兮。豈一女子之足思。

昔禹平水土而使益驅禽滌蕩川谷兮櫛梳山林是以神姦形於九鼎而異物來臻故豐狐文豹釋其表間尾騶虞獻其珍夸父獨鹿被其豪青馬三騅棄其羣此以其壯而殘其生者也若夫熊狔之遊臨江兮見厥功以乘危夔負淵以肆志兮揚震聲而皮處閒曠而或昭兮何幽隱之罔隨髏畏逼以潛身兮穴神邱之重深終或餌以求食兮鳥鑿之而能禁誠有利而可欲兮雖希覲而爲禽故近者不稱歲遠者不厯年

大○則○有○稱○於○萬○年○。細○者○則○爲○笑○於○目○前○夫○獼○猴○
直○其○微○者○也○。猶○繫○累○於○下○陳○。體○多○似○而○匪○類○。形○
乖○殊○而○不○純○。外○察○慧○而○內○無○度○兮○。故○人○面○而○獸○
心○。性○褊○淺○而○干○進○兮○。似○韓○非○之○囚○。秦○揚○眉○額○而○
驟○呻○兮○。似○巧○言○而○僞○真○。藩○從○後○之○繁○衆○兮○。猶○伐○
樹○而○喪○鄰○。整○衣○冠○而○偉○服○兮○。懷○項○王○之○思○。歸○耽○
嗜○慾○而○盼○視○兮○。有○長○卿○之○妍○姿○。舉○頭○吻○而○作○態○
兮○。動○可○增○而○自○新○。沐○蘭○湯○而○滋○穢○兮○。匪○宋○朝○之○
媚○人○。終○蚩○弄○而○處○泄○兮○。雖○近○習○而○不○親○。多才伎

其何爲。固受垢而貌侵。姿便捷而好技。兮超超騰躍乎岑嶠。既

東避兮。遂中岡而被集。

嬰徽纆以拘制兮。顧西山而長吟。緣猿桷以容與兮。志豈忘乎鄧林。庶君子之嘉惠。設奇視以盡心。且須臾以永日。焉逸豫而自矜。斯伏死於堂下。長滅沒乎形神。

鳩賦

嘉平中得兩鳩子。常食以黍稷。後卒爲狗所殺。故爲作賦。

伊嘉年之茂惠，洪肇恍忽以發蒙，有期緣之奇。
鳥以鳴鳩之攸同，翔彫木以胎隅，寄增巢於裔。
松翳雲霧以消息，遊朝陽以相從，曠踰旬而育。
類嘉七子之脩容，始戢翼而樹羽，遭金風之蕭。
瑟，旣顛覆而靡救，又振落而莫弼，陵桓山以徘徊。
臨舊鄉而思入，揚哀鳴以相送，悲一往而不。
集。終飄搖以流離，傷弱子之悼栗，何依恃以育。
養賴兄弟之親戚，背草萊以求仁，託君子之靜。
室。甘黍稷之芳饍，安戶牖之無疾，絜文襟以交。

頸抗華麗之艷溢。端妍姿以鑒飾。好威儀之如
一。聊俛仰以逍遙。求愛媚於今日。何飛翔之羨
慕。願投報而忘畢。值狂犬之暴怒。加楚害於微
軀。欲殘沒以糜滅。遂捐棄而淪失。

牋

爲鄭冲勸晉王牋

冲等死罪。伏見嘉命顯至。竊聞明公固讓。冲等
眷眷實有愚心。以爲聖王作制。百代同風。褒德
賞功。有自來矣。昔伊尹有莘氏之媵。臣耳。一佐
成湯。遂荷阿衡之號。周公籍已成之勢。據旣安
之業。光宅曲阜。奄有龜蒙。呂尚磻磻之漁者耳。
一朝指麾。乃封營邱。自是以來。功薄而賞厚者。
不可勝數。然賢哲之士。猶以爲美談。況今自先

相國以來。世有明德。翼輔魏室。以綏天下。朝無
闕政。人無謗言。前者明公西征靈州。北臨沙漠。
榆中以西。望風震服。羌戎東馳。迴首內向。東誅
叛逆。全軍獨尅。禽闔閭之將。斬輕銳之卒。以萬
萬計。威加南海。名攝三越。宇內康甯。奇慝不作。
是以殊俗畏威。東夷獻舞。故聖上覽乃昔以來。
禮典舊章。開國光宅。顯茲太原。明公宜承聖旨。
受茲介福。允當天人。元功盛勳。光光如彼。國土
嘉祚。巍巍如此。內外協同。靡謬靡違。由斯征伐。

則○可○朝○服○濟○江○掃○除○吳○會○西○塞○江○源○望○祀○岷○山○
迴○戈○弭○節○以○麾○天○下○遠○無○不○服○邇○無○不○肅○大○魏○
之○德○光○于○唐○虞○明○公○盛○勳○超○干○桓○文○然○後○臨○滄○
洲○而○謝○支○伯○登○箕○山○以○揖○許○由○豈○不○盛○乎○至○公○
至○平○誰○與○爲○鄰○何○必○勤○勤○小○讓○也○哉○沖○等○不○通○
大體敢以陳聞

阮步兵集

卷全

五

奏記

辭蔣太尉辟命奏記

籍死罪死罪伏惟明公以含一之德據上台之位羣英翹首俊賢抗足開府之日人人自以爲掾屬辟書始下下走爲首子夏處西河之上而文侯擁篲鄒子居黍谷之陰而昭王陪乘夫布衣窮居韋帶之士王公大人所以屈體而下之者爲道存也籍無鄒卜之德而有其陋猥煩大禮何以當之方將耕於東臯之陽輸黍稷之稅

陽方集 卷三 三
以避當塗者之路。負薪疲病。足力不彊。補吏之
召。非所克堪。乞迴謬恩。以光清舉。

又

違由鄙鈍。學行固野。進無和俗崇譽之高。退無
靜默恬沖之操。猥見顯飾。非所被荷。舊素疋瘵。
守病委劣。謁拜之命。未敢堪任。昔榮期帶索。仲
尼不易其三樂。仲子守志。楚王不奪其灌園。貧
榮塞賢。昧進負譏。憂望交集。五情相愧。明公侔
蹤魯衛。勳隆桓文。廣延俊傑。恢崇大業。乞降期

會以避清路畢願家巷惟蒙於許。

阮步兵集

卷全

奏記

七

書

與晉王薦盧播書

蓋聞興化濟治在於得人收奇拔異聖賢高致
是以八士歸周周道以隆虞舜登庸元凱成事
伏惟明公公侯皇靈誕秀九德光被應期作輔
論道敷化開闢四門延納羽翼賢士以贊雍熙
是以英俊之士願排皇闕策名委質真薦之徒
輻輳大府誠以鄧林昆吾翔鳳所栖懸黎和肆
垂棘所集伏見鄆州別駕同郡盧播年三十二

字景宣。少有才秀之異。長懷淑茂之量。耽道悅
禮。仗義依仁。研精墳典。升堂覩奧。聰鑒物理。心
通玄妙。貞固足以幹事。忠敬足以肅朝。明斷足
以質疑。機密足以應權。臨煩不惑。在急彌明。若
得佐時理物。則政事之器。銜命聘享。則專對之
才。潛心圖籍。文學之宗。敷藻載述。良史之表。然
而學不爲人。行不求達。故久沉淪。未階太清。誠
後門之秀偉。當時之利器。宜蒙旌命。和味鼎鉉。
孔子曰。如有所譽。必有所試。播之所能著在已。

効不敢虛飾取謗大府

答伏羲書

籍、白、承、音、覽、旨、有、心、翰、跡、夫、九、蒼、之、高、迅、羽、不、能、尋、其、巔、四、冥、之、深、幽、鱗、不、能、測、其、底、矧、無、毛、分、所、能、論、哉、且、玄、雲、無、定、體、應、龍、不、常、儀、或、朝、濟、夕、卷、翕、忽、代、興、或、泥、潛、天、飛、晨、降、宵、升、舒、體、則、八、維、不、足、暢、迹、促、節、則、無、間、足、以、從、容、是、又、瞽、夫、所、不、能、瞻、噪、蟲、所、不、能、解、也、然、則、弘、脩、淵、邈、者、非、近、力、所、能、究、矣、靈、變、神、化、者、非、局、器、所、

能察矣。何吾子之區區。而吾真之務求乎。人力
勢不能齊。好尚舛異。鸞鳳凌雲漢。以舞翼。鳩鵲
悅蓬林。以翱翔。螭浮八濱。以濯鱗。鼈娛行潦。而
羣逝。斯用情各從。其好以取樂焉。據此非彼。胡
可齊乎。夫人之立節也。將舒網以籠世。豈樽樽
以入罔。方開模以範俗。何暇毀質以適檢。若良
運未協。神機無准。則騰精抗志。邈世高超。蕩精
舉於玄區之表。攄妙節於九垓之外。而翱翔之
乘景。躍蹀躞陵忽。恍從容與道化同過。逍遙與

日月竝流。交名虛以齊變。及英祇以等化。上乎
無上。下乎無下。居乎無室。出乎無門。齊萬物之
去留。隨六氣之虛盈。總立綱於太極。撫天一於
寥廓。飄埃不能揚其波。飛塵不能垢其潔。徒寄
形軀於斯域。何精神之可察。雖業無不聞。略無
不稱。而明有所逮。未可怪也。觀吾子之趨。欲銜
傾城之金。求百錢之售。制造天之禮。擬膚寸之
檢。勞玉躬以役物。守臊穢以自畢。沈牛跡之泥
薄。愠河漢之無根。其陋可愧。其事可悲。亮規略

之懸踰。信大道之弘幽。且局步於常衢。無爲思
遠以自愁。比連疹憤。力喻不多。阮籍白。

論

樂論

劉子問曰、孔子云、安上治民、莫善於禮、移風易俗、莫善於樂、夫禮者、男女之所以別、父子之所以成、君臣之所以立、百姓之所以平也、爲政之具、靡先於此、故安上治民、莫善於禮也、夫金石、絲竹、鐘鼓、管絃之音、于戚羽、旄進退、俯仰之容、有之、何益於政、無之、何損於化、而曰移風易俗、莫善於樂乎、阮先生曰、善哉、子之問也、昔者孔

子著其都乎、且未舉其略也、今將爲子論其凡而子自備諄焉、夫樂者天地之體、萬物之性也、合其體、得其性、則和、離其體、失其性、則乖、昔者聖人之作樂也、將以順天地之體、成萬物之性也、故定天地八方之音、以迎陰陽八風之聲、均黃鐘中和之律、開羣生萬物之情氣、故律呂協則陰陽和、音聲適、而萬物類、男女不易其所、君臣不犯其位、四海同其觀、九州一其節奏、之圉山而天神下、奏之方岳而地祇上、天地合其德、

則萬物合其生。刑賞不用而民自安矣。乾坤易
簡。故雅樂不煩。道德平淡。故五聲無味。不煩則
陰陽自通。無味則百物自樂。日遷善成化而不
自知。風俗移易而同。於是樂此自然之道。樂之
所始也。其後聖人不作。道德荒壞。政法不立。智
慧擾物。化廢欲行。各有風俗。故造始之教。謂之
風。習而行之。謂之俗。楚越之風。好勇。故其俗輕
死。鄭衛之風。好淫。故其俗輕蕩。輕死故有火焰
赴水之歌。輕蕩故有桑間濮上之典。各歌其所

好。各詠其所爲。歌之者流涕。聞之者歎息。背而
去之。無不慷慨。懷永日之娛。抱長夜之歎。相聚
而合之。羣而習之。靡靡無已。棄父子之親。弛君
臣之制。匱室家之禮。廢耕農之業。忘終身之樂。
崇淫縱之俗。故江淮之南。其民好殘。漳汝之間。
其民好奔。吳有雙劍之節。趙有扶琴之客。氣發
於中。聲八於耳。手足飛揚。不覺其駭。好勇則犯
上。淫放則棄親。犯上則君臣逆。棄親則父子乖。
乖逆交爭。則患生禍起。禍起而意愈異。患生而

慮不同。故八方殊風。九州異俗。乖離分背。莫能相通。音異氣別。曲節不齊。故聖人立調適之音。建平和之聲。制便事之節。定順從之容。使天下之爲樂者。莫不儀焉。自上以下。降殺有等。至於庶人。咸皆聞之。歌謠者。詠先王之德。頌仰者。習先王之容。器具者。象先王之式。度數者。應先王之制。入於心。淪於氣。心氣和洽。則風俗齊一。聖人之爲進退頌仰之容也。將以屈形體。服心意。便所脩。安所事也。歌詠詩曲。將以宣平和。著不

逮也。鐘鼓所以節耳。羽旄所以制目。聽之者不
傾。視之者不衰。耳目不傾不衰。則風俗移易。故
移風易俗。莫善於樂也。故八音有本體。五聲有
自然。其同物者。以大小相君。有自然故。不可亂。
大小相君。故可得而平也。若夫空桑之琴。雲和
之瑟。孤竹之管。泗濱之磬。其物皆調和。涓均者。
聲相宜也。故必有常處。以大小相君。應黃鐘之
氣。故必有常數。有常處。故其器貴重。有常數。故
其制不妄。貴重。故可得。以事神。不妄。故可得。以

化人其物係天地之象故不可妄造其凡似遠
物之音故不可妄易雅頌有分故人神不雜節
會有數故曲折不亂周旋有度故頌仰不惑歌
詠有三故言語不悖導之以善綏之以和守之
以衷持之以久散其羣比其文扶其天助其壽
使去風俗之偏習歸聖王之大化先王之爲樂
也將以定萬物之情一天下之意也故使其聲
平其容和下不思上之聲君不欲臣之色上下
不爭而忠義成夫正樂者所以屏淫聲也故樂

廢則淫聲作。漢哀帝不好音。罷省樂府。而不知制正禮樂。法不脩。淫聲遂起。張放涸于長驕縱過度。丙疆景武富溢於世。罷樂之後。下移踰肆。身不是好。而淫亂愈甚者。禮不設也。刑教一體。禮樂外內也。刑弛則教不獨行。禮廢則樂無所立。尊卑有分。上下有等。謂之禮。人安其生。情意無哀。謂之樂。車服旌旗宮室飲食禮之具也。鐘磬鞀鼓琴瑟歌舞樂之器也。禮踰其制。則尊卑乖。樂失其序。則親疎亂。禮定其象。樂平其心。禮

治其外樂化其內禮樂正而天下平昔衛人求
繁纓曲縣而孔子歎息蓋惜禮壞而樂崩也夫
鐘者聲之主也縣者鐘之制也鐘失其制則聲
失其主主制無常則怪聲竝出盛衰之代相及
古今之變若一故聖敎廢毀則聰慧之人竝造
奇音景王喜大鐘之律平公好師延之曲公卿
大夫拊手嗟歎庶人羣生踊躍思聞正樂遂廢
鄭聲大興雅頌之詩不講而妖淫之曲是尋延
年造傾城之歌而孝武思嬋嫋之色雍門作松

栢之音。愍王念未寒之服。故猗靡哀思之音發。
愁怨偷薄之辭興。則人後有縱欲奢侈之意。人
後有內顧自奉之心。是以君子惡大凌之歌。憎
北里之舞也。昔先王制樂。非以縱耳目之觀。崇
曲房之嬾也。必通天地之氣。靜萬物之神也。固
上下之位。定性命之真也。故清廟之歌。詠成功
之績。賓饗之詩。稱禮讓之則。百姓化其善。異俗
服其德。此淫聲之所以薄。正樂之所以貴也。然
禮與變俱。樂與時化。故五帝不同制。三王各異

造。非其相反。應時變也。夫百姓安服。淫亂之聲。殘壞先王之正。故後王必更作樂。各宣其功德。於天下。通其變。使民不倦。然但改其名目。變造歌詠。至於樂聲平和。自若故黃帝詠雲門之神。少昊歌鳳鳥之跡。咸池六英之名。既變而黃鐘之宮。不改易。故達道之化者。可與審樂好音之聲者。不足與論律也。舜命夔龍典樂。敎胄子以中和之德也。詩言志。歌詠言聲。依詠律和聲。八音克諧。無相奪倫。神人以和。又曰。予欲聞六律。

五聲八音在治。習以出納。五言女聽。夫煩手淫聲。惜湮心耳。乃忘平和。君子弗聽。言正樂通平易簡。心澄氣清。以聞音律。出納五言也。夔曰。戛擊鳴球。搏拊琴瑟。以詠祖考來格。虞賓在位。羣后德讓。下管鼗鼓。合止祝敔。笙鏞以間。鳥獸蹠蹠。簫韶九成。鳳凰來儀。夔曰。於予擊石拊石。百獸率舞。庶尹允諧。詩言志。歌詠言操。磬鳴琴。以聲依律。述先王之德。故祖考之神來格也。笙鏞以間。正樂聲希。治脩無害。故繁毓蹠蹠然也。樂

有節適。九成而已。陰陽調達。和氣均通。故遠鳥
來儀也。質而不文。四海合同。故擊石拊石。百獸
率舞也。言天下治平。萬物得所。音聲不譁。漠然
未兆。故衆官皆和也。故孔子在齊。聞韶。三月不
知肉味。言至樂使人無欲心。平氣定。不以肉爲
滋味也。以此觀之。知聖人之樂和而已矣。自西
陵青陽之樂。皆取之竹。聽鳳凰之鳴。尊長風之
象。采大林之。當時之所不見。百姓之所希聞。
故天下懷其德而化其神也。夫雅樂周通。則萬

物○和○質○靜○則○聽○不○淫○易○簡○則○節○制○全○神○靜○重○則○
服○人○心○此○先○王○造○樂○之○意○也○自○後○衰○末○之○爲○樂○
也○其○物○不○真○其○器○不○固○其○制○不○信○取○於○近○物○同○
於○人○間○各○求○其○好○恣○意○所○存○閭○里○之○聲○競○高○永○
巷○之○音○爭○先○童○兒○相○聚○以○詠○富○貴○芻○牧○負○戴○以○
歌○賤○貧○君○臣○之○職○未○廢○而○一○人○懷○萬○心○也○當○夏○
后○之○末○輿○女○萬○人○衣○以○文○繡○食○以○梁○肉○端○噪○晨○
歌○聞○之○者○憂○戚○天○下○苦○其○殃○百○姓○傷○其○毒○殷○之○
季○君○亦○奏○斯○樂○酒○池○肉○林○夜○以○繼○日○然○咨○嗟○之○

音未絕而敵國已收其琴瑟矣。滿堂而飲酒樂奏而流涕。此非皆有憂者也。則此樂非樂也。當王居臣之時。奏新樂於廟中。聞之者皆爲之悲咽。桓帝聞楚琴。悽愴傷心。倚房而悲。慷慨長息曰。善哉乎爲琴。若此一而已足矣。順帝上恭陵過樊衢。聞鳥鳴而悲。泣下橫流曰。善哉鳥聲。使左右吟之曰。使絲聲若是。豈不樂哉。夫是謂以悲爲樂者也。誠以悲爲樂。則天下何樂之有。天下無樂。而有陰陽調和。災害不生。亦已難矣。樂

者使人精神平和。衰氣不入。天地交泰。遠物來
集。故謂之樂也。今則流涕感動。噓唏傷氣。寒暑
不適。庶物不遂。雖出絲竹。宜謂之哀。奈何俛仰
歎息。以此稱樂乎。昔季流子向風而琴。聽之者
泣下沾襟。弟子曰。善哉。鼓琴亦已妙矣。季流子
曰。樂謂之善。哀謂之傷。吾謂哀傷非爲善樂也。
以此言之。絲竹不必爲樂。歌詠不必爲善也。故
墨子之非樂也。悲夫。以哀爲樂者。胡亥就哀不
變。故願爲黔首。李斯隨哀不返。故思逐狡兔。鳴

呼君子可不鑒之哉

通易論

阮子曰易者何也。乃昔之立真。往古之變經也。庖犧氏當天地一終。值人物憔悴。利用不存。法制夷昧。神明之德不通。萬物之情不類。於是始作八卦。引而伸之。觸類而長之。分陰陽。序剛柔。積山澤。連水火。雜而一之。變而通之。終于未濟。六十四卦。盡而不窮。是以天地象而萬物形。吉凶著而悔吝生。事用有取。變化有成。南面聽斷。

向明而治。結繩而爲網罟。致日中之貨。脩耒耜之利。以教天下。皆得其所。黃帝堯舜。應時當務。各有攸取。窮神知化。述則天序。庖犧氏布演六十四卦之變。後世聖人觀而因之。象而用之。禹湯之經皆在。而上古之文不存。至乎文王。故係其辭。於是歸藏氏逝。而周典經興。上下無常。剛柔相易。不可爲典要。惟變所適。故謂之易。易之爲書也。本天地。因陰陽。推盛衰。出自幽微。以致明著。故乾元初潛龍勿用。言大人之德。隱而未

彰。潛而未達。待時而興。循變而發。天地旣設。屯
蒙始生。需以待時。訟以立義。師以聚衆。比以安
民。是以先王以建萬國。親諸侯。收其心也。原而
積之。畜而制之。是以上下和洽。裁成天地之道。
輔相天地之宜。以左右民。順其理也。先王旣沒。
德法乖易。上凌下替。君臣不制。剛柔不和。天地
不交。是以君子一類求同。遏惡揚善。以致其大
謙而光之。哀多益寡。崇聖善以命。雷出於地。於
是大人得位。明聖又興。故先王作樂薦上帝。昭

明其道以答天貺。於是萬物服從。隨而事之。子
遵其父。臣承其君。臨馭統一。大觀天下。是以先
王以省方。觀民設教。儀之以度也。包而有之。含
而含之。故先王用之以明罰勅法。自上乃下。貴
復其賤。美成亨。盡時極。日至先王閉關。商旅不
行。后不省方。以靜民也。季葉旣衰。非謀之獲應。
運順天。不妄其作。故先王茂對時育萬物。施仁
布澤。以樹其德也。萬物歸隨。如法流承。養善反
惡。利積生害。剛過失柄。習坎以位。上失其道。下

喪其羣。於是大人繼明照于四方。顯其德也。自
乾元以來。施平而明。盛衰有時。剛柔無常。或得
或失。一陰一陽。出入吉凶。由闇察彰。文明以止。
有翼不飛。隨之乃存。取之者歸。施之以若。用之
在微。貴變慎小。與物相追。非知來藏往者。莫之
能審也。易之爲書也。覆燾天地之道。囊括萬物
之情。道至而反。事極而改。反用應時。改用當務。
應時故天下仰其澤。當務故萬物恃其利。澤施
而天下服。此天下之所以順自然。惠生類也。富

貴侔天地。功名充六合。莫之能傾。莫之能害者。
道不逆也。天地易之主也。萬物易之心也。故虛
以受之。感以和之。男下女上。通其氣也。柔以承
剛。久其類也。順而持之。遁而退之上。隆不積剛。
動大壯。正大必用力。盛則望明。升惟進。光大則
傷聚。以處身異。以成類。乖離既解。緩以爲失損。
益有時。察以主使。揚于王庭。乘五馬。敗剛既決。
柔上索下。合令臣。遭明君。以柔遇剛。品物咸亨。
剛據中正。天下大行。是以后用施命。誥四國。貴。

離教也。於是天地萃聚。百姓合同。升而不已。屈
極及下。井養不窮。卑不能通。不可弗革。改以成
器。尊卑有分。長幼有序。主之以震。守之以威。動
不可終。敵應而行。漸以進之。爲人求位。君子之
欲進者也。臣之求君。陰之從陽。委之歸誠。乃得
其所歸。而應之專。而一之。陽德受歸。道豐位大
也。賢人君子。有衆以成其大也。窮侈喪大夫之
位。羣而靡容。容而無所。卑身下意。利見大人。巽
以申命。柔順乎剛。入而說之。說而教之。順天應

人。渙然成章。風行水上。有文有光。男行不窮女
位乎外。衆陰承五。上同在中。從初更始。乘木有
功。故先王以享于帝。立廟奉天。建國也。剛柔分
適得中。節之以制。其道不窮。信愛結內。剛得中
位。誠發於心。庶物唯類。大得則虧。甚往則過。既
應於遠。默則不利。故君子是以行重乎恭。喪重
乎哀。篤僞薄也。小過下泰。不宜於上。下止上動。
有飛鳥之象焉。初六坎下。上六離體。飛鳥以凶。
是以災眚也。柔處中。剛失位。利與時行。過而欲

述。小亨正象。陰皆乘陽。陽剛凌替。君臣易位。亂而不已。非中之謂。故君子思患而豫防之。慮其敗也。通變無窮。周敗又始。剛未出陰在中。柔濟不遺。遂度不窮。則象河洛神物設教。而天下服。慎辨居方。陰陽相求。初與之道。遠作之由也。卦體開闔。乾以一爲開。坤以二爲闔。乾坤成體而剛柔有位。故木老於未。水生於申。而坤在西南。火老於戌。木生於亥。而乾在西北。剛柔之際也。故謂之父母。陽承震動。發而相承。專制遂行。萬

物以興。故謂之長男。水老於辰。金生於巳。一氣
存之。終而復起。故巽爲長女。震發於風。陰德有
紀。火中鵲鳴。母道將始。故離爲中女。又在西北。
健戰將升。季陰幼昧。衰而不勝。故兌爲少女。倉
中拔畱。肇幽爲陽。在中未達。含而未章。故坎爲
中男。周流接合。萬物旣終。造微更始。明而未融。
故艮爲少男。乾圓坤方。女柔男剛。健柔時推。而
禍福是將。循化知生。從變見亡。故吉凶成敗。不
可亂也。大過何也。棟橈莫輔。大者過也。先王之

馭世也。刑設而不犯。罰著而不施。習坎剛中。惟以心亨。王正其德。公守厥職。上下不疑。臣主無惑。納約自牖。非戶何咎。車騎中門。劒戟在闥。雖寘叢棘。凶已三歲。上六失道。刑決也。故高宗伐鬼方。柔道中也。三年有賞。德乃豐也。同人先號。思其終也。旅上之美。樂其窮也。是以失刑者嚴。而不檢喪德者高。而不尊。故君子正義以守位。固法以威民。何衢則亨。滅耳而凶也。小過何也。踰位凌上。害正危身。小者過也。旣濟初六終亂。

何也水加日上三陰乘陽以力求濟不止必亡

故初吉終亂也。未濟上六飲酒無咎何也。過而莫改。危而弗聞。誰咎之也。无妄何也。無望而至。非會合陰陽之違行也。六三無妄之灾。或繫之牛。行人得之。邑人灾何也。有國而不收其民。有衆而不脩其器。行人得之。不亦灾乎。九五之疾。勿藥何也。非常之厚離。以爲同。无妄之疾。灾以除。凶。天時成敗。何疾之功。勿藥有喜。不成何試也。龍者何也。陽健之類。盛德尊貴之喻也。配天

之厚。盛德莫高之謂尊。貴大人受命處中。當陽
德之至也。亢龍有悔。何也。繼守承貴。有因而德。
不充者也。欲大而不顧其小。甘侈而不思其匱。
居正上位而無卑。有貴勞而無據。喪志危身。是
以悔也。先王何也。大人之功也。故建萬國。親諸
侯。樹其義也。作樂薦上帝。正其命也。省方觀民
施其令也。明罰勅法。督其政也。閉關不行。靜亂
民也。茂時育德。應顯其福也。享帝立廟。昭其祿
也。稱聖王所造。非承平之謂也。后者何也。成君

定位。據業脩制。保教守法。畜履治安者也。故自然成功濟用。已至大通。后成天地之道。以左右民也。成化理決。施令誥方。因統紹衰中。處將正之務。非應初受命之事也。上者何也。日月相易。盛衰相及。致飾則利之未捷。受故王后不稱君子。不錯上以厚下。道自然也。君子者何也。佐聖扶命。翼教明法。觀時而行。有道而臣人者也。因正德以理其義。察危廢以守其身。故經綸以正。盈果行以遂義。飲食以須時。辯義以作事。皆所

以章先王之建國。輔聖人之神志也。見險慮難。思患預防。別物居方。慎初敬始。皆人臣之行。非大君之道也。大人者何也。龍德潛達。貴賤通明。有位無稱。大以行之。故大過滅示天下。幽明大人發輝重光。繼明照于四方。萬物仰生。合德天地。不爲而成。故大人虎變。天德興也。君子曰。易順天地序萬物。方圓有正體。四時有常位。事業有所麗。鳥獸有所萃。故萬物莫不一也。陰陽性生。性故有剛柔。剛柔情生。情故有愛惡。愛惡生。

得失得失生悔。悔者著而吉凶見。八卦居方以正性。著龜圓通以索情。情性交而利害出。故立仁義以定性。取著龜以制情。仁義有偶而禍福分。是故聖人以建天下之位。定尊卑之制。序陰陽之適。別剛柔之節。順之者存。逆之者亡。得之者身安。失之者身危。故犯之以別求者。雖吉必凶。知之以守篤者。雖窮必通。故寂寞者德之主。恣睢者賊之原。進往者反之初。終盡者始之根。也是以未至不可拆也。已用不可越也。紂有

天○下○之○號○而○比○匹○夫○之○類○鄰○周○處○小○侯○之○細○而○
享○千○西○山○之○賔○外○內○之○德○已○施○而○貴○賤○之○名○未○
分○何○也○天○道○未○究○善○惡○未○涖○也○是○以○明○夫○天○之○
道○者○不○欲○審○乎○人○之○德○者○不○憂○在○上○而○不○凌○乎○
下○處○卑○而○不○犯○乎○貴○故○道○不○可○逆○德○不○可○拂○也○
是○以○聖○人○獨○立○無○悶○大○羣○不○益○釋○之○而○道○存○用○
之○而○不○可○旣○由○此○觀○之○易○以○通○矣○

達莊論

伊單闕之辰執徐之歲萬物權輿之時季秋遙

夜之月先生徘徊翺翔迎風而遊。往遵乎赤水之上來登乎隱全之邱。臨乎曲轅之道。顧乎泱泱之州。恍然而止。忽然而休。不識曩之所以行。今之所以畱。悵然而無樂。愀然而歸。白素焉。平晝閒居。隱几而彈琴。於是縉紳好事之徒。相與聞之。共議撰辭合句。啓所常疑。乃闕鑒整飭。嚼齒先引。推年躡踵。相隨俱進。奕奕然步。臍臍然視。投跡蹈階。趨而翔至。差肩而坐。恭袖而檢。猶豫相臨。莫肯坐占。有一人。是其中雄桀也。乃怒。

目擊勢而大言曰吾生乎唐虞之後長乎文武
之裔遊乎成康之隆盛乎今者之世誦乎六經
之教習乎吾儒之迹被袞衣冠飛翮垂曲裾揚
雙鷗有日矣而未聞乎至道之要有以異之於
斯乎且大人稱之細人承之願聞至教以發其
疑先生曰何哉子之所疑者客曰天道貴生地
道貴貞聖人脩之以建其名吉凶有分是非有
經務利高勢惡死重生故天下安而大功成也
今莊周乃齊禍福而一死生以天地爲一物以

萬類爲一指無乃激惑以失真而自以爲誠是也於是先生乃撫琴容與慨然而歎俛而微笑仰而流盼噓喻精神言其所見曰昔人有欲觀於閬峰之上者資端冕服驂騑至乎崑崙之下沒而不反端冕者常服之飾驂騑者凡乘之耳非所以矯騰增城之上遊玄圃之中也且燭龍之光不照一堂之上鐘山之口不談曲室之內今吾將墮崔巍之高杜衍謾之流言子之所由幾其寤而獲及乎天地生於自然萬物生於天

地自然者無外。故天地名焉。天地者有內。故萬物生焉。當其無外。誰謂異乎。當其有內。誰謂殊乎。地流其燥。天抗其溼。月東出。日西入。隨以相從。解而後合。升謂之陽。降謂之陰。在地謂之理。在天謂之文。蒸謂之雨。散謂之風。炎謂之火。凝謂之冰。形謂之石。象謂之星。朔謂之朝。晦謂之冥。通謂之川。回謂之淵。平謂之土。積謂之山。男女同位。山澤通氣。雷風不相射。水火不相薄。天地合其德。日月順其光。自然一體。則萬物經其

常入謂之幽。出謂之章。一氣盛衰變化而不傷。是以重陰雷電。非異出也。天地日月非殊物也。故曰。自其異者視之。則肝膽楚越也。自其同者視之。則萬物一體也。人生天地之中。體自然之形。身者陰陽之積氣也。性者五行之正性也。情者遊魂之變欲也。神者天地之所以馭者也。以生言之。則物無不壽。推之以死。則物無不夭。自小視之。則萬物莫不小。由大觀之。則萬物莫不大。殤子爲壽。彭祖爲夭。秋毫爲大。泰山爲小。故

以死生爲一貫。是非爲一條也。別而言之則鬚眉異名。合而說之則體之一毛也。彼六經之言分處之教也。莊周之云。致意之辭也。大而臨之則至極無外。小而理之則物有其制。夫守什五之數。審左右之名。一曲之說也。循自然性天地者。寥廓之談也。凡耳目之官。名分之施。處官不易司。舉奉其身。非以絕手足。裂肢體也。然後世之好異者。不顧其本。各言我而已矣。何待於彼。殘生害性。還爲讎敵。斷割肢體。不以爲痛。目視

色而不顧耳之所聞耳所聽而不待心之所思
心奔欲而不適性之所安故疾病萌則生意盡
禍亂作則萬物殘矣至人者恬於生而靜於死
生恬則情不惑死靜則神不離故能與陰陽化
而不易從天地變而不移生究其壽死循其宜
心氣平治消息不虧是以廣成子處崆峒之山
以入無窮之門軒轅登崑崙之阜而遺玄珠之
根此則潛身者易以爲活而離本者難以永存
也馮夷不遇海若則不以已爲小雲將不失於

鴻濛則無以知其少。由斯言之。自是者不章。自建者不立。守其有者有據。持其無者無執。月弦則滿。日朝則襲。咸池不畱。陽谷之上。而懸車之後。將入也。故求得者喪。爭明者失。無欲者自足。空虛者受實。夫山靜而谷深者。自然之道也。得之道而正者。君子之實也。是以作智造巧者害於物。明著是非者危其身。脩飾以顯潔者惑於生。畏死而榮生者失其真。故自然之理。不得作。天地不泰。而日月爭隨。朝夕失期。而晝夜無分。

競逐趨利。舛倚橫馳。父子不合。君臣乖離。故復
言以求信者。梁下之誠也。克己以爲人者。郭外
之仁也。竊其雉經者。亡家之子也。刳腹割肌者。
亂國之臣也。曜菁華。被沆瀣者。昏世之士也。履
霜露。蒙塵埃者。貪冒之民也。潔已以尤世。脩身
以明滂者。誹謗之屬也。繁稱是非。背質追文者。
迷罔之倫也。成非媚悅。以容求孚。故被珠玉以
赴水火者。桀紂之終也。含菽采薇。交餓而死。顏
夷之窮也。是以名利之塗開。則忠信之誠薄。是

非之辭著。則醇厚之情爍也。故至道之極。混一不分。同爲一體。得失無聞。伏羲氏結繩。神農教耕。逆之者死。順之者生。又安知貪吝之爲罰。而貞白之爲名乎。使至德之要無外而已。大均溥固。不貳其紀。清淨寂寞。空豁以俟。善惡莫之分。是非無所爭。故萬物反其所而得其情也。儒墨之後。堅白竝起。吉凶連物。得失在心。結徒聚黨。辯說相侵。昔大齊之雄三晉之士。嘗相與瞋目張膽。分別此矣。咸以爲百年之生難致。而日月

之蹉無常。皆盛僕馬。脩衣裳。美珠玉。飾帷牆。出媚君上。八欺父兄。矯厲才智。競逐縱橫。家以慧子。殘國以才。臣亡故不終其天年。而大自割繫其於世俗也。是以山中之木。本大而莫相。吹萬數竅相和。忽焉自己。夫鴈之不存。無其質而濁其文。死生無變。而龜之見寶。知吉凶也。故至人清其質而濁其文。死生無變而未始有云。夫別言者。壞道之談也。折辯者。毀德之端也。氣分者。一身之疾也。二心者。萬物之患也。故夫裝束馮

軾者。行以離支。慮在成敗者。坐而求敵。踰阻攻
險者。趙氏之人也。舉山填海者。燕楚之人也。莊
周見其若此。故述道德之妙。叙無爲之本。寓言
以廣之。假物以延之。聊以娛無爲之心。而逍遙
於一世。豈將以希咸陽之門。而與稷下爭辯也
哉。夫善接人者。導焉而已。無所逆之。故公孟季
子衣繡而見。墨子弗攻。中山子牟心在魏闕。而
詹子不距。因其所以來。用其所以至。循而泰之。
使自居之。發而開之。使自舒之。且莊周之書。何

足道哉。猶未聞夫太始之論。立古之微言乎。直能不害於物。而形以生物。無所毀。而神以清形。神在我。而道德成。忠信不離。而上下平。茲客今談而同古。齊說而意殊。是心能守其本。而口發不相須也。於是二三子者。風搖波蕩。相視臍脉。亂次而退。蹉跌失迹。隨而望之耳。後頗亦以是知其無寔喪氣。而慙愧於衰僻也。

通老論

聖人明於天人之理。達於自然之分。通於治化

之體。審於大慎之訓。故君臣垂拱。完太素之機。
百姓熙怡。保性命之和。

道者法自然而爲化。侯王能守之。萬物將自化。
易謂之太極。春秋謂之元。老子謂之道。

三皇依道。五帝仗德。三王施仁。五霸行義。強國
任智。蓋優劣之異。薄厚之降也。

阮步兵集

卷全

四

傳

大人先生傳

大人先生、蓋老人也、不知姓字、陳天地之始、言神農黃帝之事、昭然也、莫知其生年之數、嘗居蘇門之山、故世或謂之間、養性延壽、與自然齊光、其視堯舜之所事、若手中耳、以萬里爲一步、以千歲爲一朝、行不赴而居不處、求乎大道而無所寓、先生以應變順和、天地爲家、運去勢墮、魁然獨存、自以爲能足與造化推移、故默探道

德不與世同、自好者非之、無識者怪之、不知其
變化神微也、而先生不以世之非怪而易其務
也、先生以爲中區之在天下、曾不若蠅蚊之着
帷、故終不以爲事、而極意乎異方奇域、遊鑒觀
樂、非世所見、徘徊無所終極、遺其書於蘇門之
山而去、天下莫知其所如往也、或遺大人先生
書曰、天下之貴莫貴於君子、服有常色、貌有常
則、言有常度、行有常式、立則磬折拱若抱鼓、動
靜有節、趨步商羽、進退周旋、咸有規矩、心若懷

永戰戰慄慄束身脩行日慎一日擇地而行唯
恐遺失誦周孔之遺訓歎唐虞之道德唯法是
脩唯禮是克手執珪璧足履繩墨行欲爲目前
檢言欲爲無窮則少稱鄉閭長聞邦國上欲圖
三公下不失九州牧故挾金玉垂文組享尊位
取茅土揚聲名於後世齊功德於往古奉事君
上牧養百姓退營私家育長妻子卜吉宅慮乃
億祉遠禍近福永堅固已此誠士君子之高致
古今不易之美行也今先生乃被髮而居巨海

之中與若君子者遠、吾恐世之歎先生而非之、
也行爲世所笑、身無由自達、則可謂恥辱矣、身
處困苦之地、而行爲世俗之所笑、吾爲先生不
取也、於是夫人先生乃迢然而歎、假雲霓而應
之曰、若之云、尚何通哉、夫大人者、乃與造物同
體、天地竝生、逍遙浮世、與道俱成、變化散聚、不
常其形、天地制域於內、而浮明開達於外、天地
之永固、非世俗之所及也、吾將爲汝言之、往者
天嘗在下、地嘗在上、反覆顛倒、未之安固焉、得

不失度式而常之天因地動山陷川起雲散震
壤六合失理汝又焉得擇地而行趨步商羽往
者羣氣爭存萬物死慮支體不從身爲泥土根
拔枝殊咸失其所汝又焉得束身脩行磬折抱
鼓李牧功而身死伯宗忠而世絕進求利以喪
身營爵賞而家滅汝又焉得挾金玉萬億祇奉
君上而全妻子乎且汝獨不見夫虱之處於禪
中逃乎深縫匿乎壤絮自以爲吉宅也行不敢
離縫際動不敢出禪襠自以爲得繩墨也饑則

嚙人自以爲無窮食也。然炎邱火流焦邑滅都
羣虱死於禪中而不能出。汝君子之處區內亦
何異夫虱之處禪中乎。悲夫。而乃自以爲遠禍
近福。堅無窮已。亦觀夫陽鳥遊於塵外而鷦鷯
戲於蓬艾。小大固不相及。汝又何以爲若君子
聞於予乎。且近者夏喪於商。周播之劉耿。薄爲
墟。豐鎬成邱。至人來一顧。而世代相酬。厥居未
定。他人已有。汝之茅土。將誰與久。是以主人不
處而居。不脩而治。日月爲正。陰陽爲期。豈忘情

乎世繫累於一時來東雲駕西風與陰守雌據陽爲雄志得欲從物莫之窮又何不能自達而畏夫世笑哉昔者天地開闢萬物竝生大者恬其性細者靜其形陰藏其氣陽發其精害無所避利無所爭放之不失收之不盈亡不爲夭存不爲壽福無所得禍無所咎各從其命以度相守明者不以智勝闇者不以愚敗弱者不以迫畏強者不以力盡蓋無君而庶物定無臣而萬事理保身脩性不違其紀惟茲若然故能長久

今汝造音以亂聲、作色以詭形、外易其貌、內隱其情、懷欲以求多、詐僞以要名、君立而虐、與臣設而賊、生坐制禮法、束縛下民、欺愚誑拙、藏智自神、强者睽眠而凌暴、弱者憔悴而事人、假廉以成貪、內險而外仁、罪至不悔、過幸遇則自矜、馳此以奏除、故循滯而不振、夫無貴則賤者不怨、無富則貧者不爭、各足於身而無所求也、恩深無所歸、則死敗無所仇、奇聲不作、則耳不易聽、淫色不顯、則目不改視、耳目不相易改、則無

以亂其神矣。此先世之所至止也。今汝尊賢以相高，競能以相尚，爭勢以相君，寵貴以相加，驅天下以趣之，此所以上下相殘也。竭天地萬物之至，以奉聲色無窮之欲，此非所以養百姓也。於是懼民之知其然，故重賞以喜之，嚴刑以威之，財匱而賞不供，刑盡而罰不行，乃始有亡國戮君潰敗之禍，此非汝君子之爲乎？汝君子之禮法，誠天下殘賊亂危死亡之術耳，而乃目以爲美行不易之道，不亦過乎？今吾乃飄飄於天

地之外與造化爲友朝飡湯谷夕飲西海將變化遷易與道周始此之於萬物豈不厚哉故不通於自然者不足以言道闇於昭昭者不足與達明子之謂也先生旣申若言天下之喜奇者異之忼慨者高之其不知其體不見其情猜耳其道虛僞之名莫識其真弗達其情雖異而高之與嚮之非怪者蔑如也至人者不知乃貴不見乃神神貴之道存乎內而萬物運於外矣故天下終而不知其用也過乎有宗扶搖之野有

隱士焉見之而喜。自以爲均志同行也。曰善哉。吾得之見而舒憤也。上古質樸淳厚之道已廢。而末枝遺華竝興。豺虎貪虐。羣物無辜。以害爲利。殞性亡軀。吾不忍見也。故去而處茲。人不可與爲儔。不若與木石爲隣。安期逃乎蓬山。角李潛乎丹水。鮑焦立以枯槁。萊維去而迫死。亦由茲夫。吾將抗志顯高。遂終於斯。禽生而獸死。埋形而遺骨。不復反。余之生乎。夫志均者。相求好合者。齊顏與夫子同之。於是先生乃舒虹霓以

著塵傾雪蓋以蔽明倚瑤廂而徘徊總衆轡而
安行顧而謂之曰泰初真人唯大之根專氣一
志萬物以存退不見後進不覩先發西北而造
制啓東南以爲門微道而以德久娛樂跨天地
而處尊夫然成吾體也是以不避物而處所覩
則甯不以物爲累所過則成徜徉足以舒其意
浮騰足以逞其情故至人無宅天地爲客至人
無主天地爲所至人無事天地爲故無是非之
別無善惡之異故天下被其澤而萬物所以熾

也若夫惡彼而好我自是而非人忿激以爭求
貴志而賤身伊禽生而獸死尚何顯而獲榮悲
夫子之用心也薄安利以忘生要求名以喪體
誠與彼其無詭何枯槁而迫死子之所好何足
言哉吾將去子矣乃揚眉而蕩目振袖而撫裳
今緩轡而縱筴遂風起而雲翔彼人者瞻之而
垂泣自痛其志衣草木之皮伏于巖石之下懼
不終久而死先生過神宮而息漱吳泉而行迴
乎過而遊覽焉見薪於阜者歎曰汝將焉以是

終乎哉、薪者曰、是終我乎、不以是終我乎、且聖
人無懷、何其哀、夫盛衰變化、常不于茲、藏器於
身、伏以俟時、孫則足以擒龐、睢折脇而乃休、百
里困而相羸、牙旣老而弼周、旣顛倒而更來、兮、
固先窮而後收、秦破六國、并兼其地、夷滅諸侯、
南面稱帝、姱盛色、崇靡麗、鑿南山以爲闕、表東
海以爲門、門萬室而不絕、圖無窮而永存、美宮
室而盛帷幃、擊鐘鼓而揚其章、廣苑囿而深池
沼、興渭北而建咸陽、麤木曾未及成林、而荆棘

已藁乎阿房時代存而迭處故先得而後亡山
東之徒虜遂起而王天下由此視之窮達詎可
知耶且聖人以道德爲心不以富貴爲志以無
爲用不以人物爲事尊顯不加重貧賤不自輕
失不自以爲辱得不自以爲榮木根挺而枝遠
葉繁茂而華零無窮之死猶一朝之生身之多
少又何足營因歎而歌曰日沒不周方月出丹
淵中陽精蔽不見陰光大爲雄亭亭在須臾厭
厭將復東離合雲霧今往來如飄風富貴俛仰

間貧賤何必終，留侯起亡虜，威武赫夷荒，召平
封東陵，一旦爲布衣，枝葉托根柢，死生同盛衰，
得志從命升，失勢與時隕，寒暑代征邁，變化更
相推，禍福無常主，何憂身無歸，推茲由斯，負
薪又何哀，先生聞之笑，曰：雖不及大，庶免小矣。
乃歌曰：天地解兮六合開，星辰實兮日月隕，我
騰而上將何懷，衣弗襲而服美，佩弗飾而自章，
上下徘徊兮誰識，吾常遂去而遐浮，肆雲輦興
氣蓋，徜徉回翔兮，澹澹之外，建長星以爲旗兮，

擊雷霆之礧礧，開不周而出車兮。步九野之夷
泰，坐中州而一顧兮。望崇山而迴邁，端余節而
飛旃兮。縱心慮乎荒裔，釋前者而弗脩兮。馳蒙
闇而遠過，棄世務之衆爲兮。何細事之足賴，虛
形體而輕舉兮。精微妙而神豐，命夷羿使寬日
兮。召忻來使，緩風攀扶桑之長枝兮。登扶搖之
隆崇，躍潛飄之冥昧兮。洗光曜之昭明，遺衣裳
而弗服兮。服雲氣而遂行，朝造駕乎湯谷兮。夕
息馬乎長泉，時崦嵫而易氣兮。輝若華以照冥

左朱陽以舉麾兮，右玄陰以建旗。變客節而改度，遂騰竊以脩征。陰陽更而代邁，四時奔而相過。惟仙化之倏忽兮，心不樂乎久畱。驚風奮而遺樂兮，雖雲起而忘憂。忽電消而神過兮，厯寥廓而遐遊。佩日月以舒光兮，登徜徉而上浮。壓前進于彼廼兮，將步足乎虛州。掃紫宮而陳席兮，坐帝室而忽會。酬萃衆音而奏樂兮，聲驚渺而悠悠。五帝舞而再屬兮，六神歌而伐周。樂啾啾肅肅，洞心達神。超遙遙茫茫，心往而忘反慮。

大而志矜，粵大人微而弗復兮，揚雲氣而上陳。
召大幽之玉女兮，接上王之美人體雲氣之過。
暢兮，服太清之淑真，合歡情而微授兮，先艷溢。
其若神，華姿燁以俱發兮，采色煥其竝振，傾立。
髦而垂鬢兮，曜紅顏而自新，時曖曖而將逝兮。
風飄颻而振衣，雲氣解而霧離兮，靄奔散而永。
歸，心恹恹而遙思兮，眇迴目而弗晞，揚清風以。
爲旟兮，翼旋軫而反衍，騰炎陽而出疆兮，命祝。
融而使遣，驅玄冥以攝堅兮，蓐收秉而先戈，勾。

芒奉轂浮驚朝霞寥廓茫茫而靡都兮邈無傳
而獨立倚瑤廂而一顧兮哀下土之憔悴分是
非以爲行兮又何足與比類霓旌飄兮雲旂靄
樂遊兮出天外大人先生被髮飛鬢衣方離之
衣繞紱陽之帶含奇芝嚼甘華喻浮霧食霄霞
興朝雲颺春風奮乎太極之東遊乎崑崙之西
遺轡隤策流盼乎唐虞之都惘然而思悵爾若
忘慨然而歎曰嗚呼時不若歲歲不若天天不
若道道不若神神者自然之根也彼勾勾者自

以爲貴夫世矣而惡知夫世之賤乎茲哉故與
世爭貴貴不足尊與世爭富富不足先必超世
而絕羣遺俗而獨往登乎太始之前覽乎沕漠
之初慮周流於無外志浩蕩而自舒飄颻於四
運翻翱翔乎八隅欲從肆而彷彿浣瀼而靡拘
細行不足以爲毀聖賢不足以爲譽變化移易
與神明扶廓無外以爲宅周宇宙以爲廬強入
維而處安據制物以永居夫如是則可謂富貴
矣是故不與堯舜齊德不與湯武竝功王許不

足以爲匹陽邱豈能與比縱天地且不能越其
壽廣成子曾何足與竝容激八風以揚聲躡元
吉之高蹤被九天以開除兮來雲氣以馭飛龍
專上下以制統兮殊古今而靡同夫世之名利
胡足以累之哉故提齊而蹶楚挈趙而蹈秦不
滿一朝而天下無人東西南北莫之與隣悲夫
子之脩飾以余觀之將焉存乎於茲先生乃去
之紛決莽軌沕泮汙衍溢厯度重淵跨青天顧
而過覽焉則有逍遙以永年無存忽合散而上

臻。霍分離。蕩漾漾。淨淨。飈涌雲浮。達於搖光。直
馳驚乎太初之中。而休息乎無爲之宮。太初何
如。無後無先。莫究其極。誰識其根。邈渺綿綿。乃
反復乎大道之所存。莫暢其究。誰曉其根。辟九
靈而求索。曾何足以自隆。登其萬天。而通觀浴
大始之和風。溯逍遙以遠過。遵大路之無窮。遺
太乙而弗使。陵天地而徑行。超濛鴻而遠跡。左
蕩莽而無涯。右幽悠而無方。上遙聽而無聲。下
脩視而無章。施無有而宅神。永太清乎敖翔。崔

巍高山勃立雲朔風橫厲白雪紛積水若陵寒
傷人陰陽失位日月隕地坼石裂林木摧火冷
陽凝寒傷懷陽和微弱隆陰竭海凍不流綿絮
折呼噏不通寒傷裂氣并代動變如神寒倡熱
隨害傷人熙與真人懷太清精神專一用意平
寒暑勿傷莫不驚憂患靡由素氣甯浮霧凌天
恣所經往來微妙路無傾好樂非世又何爭人
且皆死我獨生真人遊駕八龍曜日月載雲旗
非回直樂新之真人遊太皆夷原辟天門開

濛濛風颺颺，登黃山，出栖遲，江河清洛無埃，雲
氣消，真人來，真人來，唯樂哉！時世易好，樂墮真
人去，與天回，反未央，延年壽，獨敖世，望我何時
反，赴湯湯，路日遠，先生從此去矣，天下莫知其
所終極，蓋陵天地而與浮，明遨遊無始終，自然
之至真也。鸚鵡不踰濟，貉不渡汶，世之常人亦
由此矣。會不通區域，又況四海之表，天地之外
哉？若先生者，以天地爲卵耳，如小物細人，欲論
其長短，議其是非，豈不哀也哉！

阮步兵集

卷全

五

贊

老子贊

陰陽不測變化無倫飄飄太素歸虛反真

元長集

卷八

贊

八

防步兵集

卷全

五

詩

孔子詠

養徒三千，升堂七十。潛神演思，因使作書。考混
元於無形，本造化於太初。

書

書

書

書

書

書

書

帖

搏赤猿帖

僕不想歛爾夢搏赤猿其力甚于貔虎良久反
覆余乃觀天背地觀穹亦當不爽但僕之不達
安得不憂吉乎報我凶乎詳告三月阮籍白繇
君

陽明先生全集卷八

文

弔某公文

沈漸荼酷、仁義同違、如何不弔、玉碎冰摧

阮步兵集

卷全

全

詩

詩品云阮籍詩其源出於小雅。無雕蟲之功。而詠懷之作。可以陶性靈。發幽思。言在耳目之內。情寄八荒之表。洋洋乎會於風雅。使人忘其鄙近。自致遠大。頗多感慨之詞。厥旨淵放。歸趣難求。顏延之注解。怯言其志。詩譜云。天識清虛。禮法疎短。竹林詩評云。阮籍之作。如剡溪雪夜。孤楫沿流。乘興而來。興盡而已。嚴滄浪云。黃初之後。惟阮籍詠懷之作。極為高古。有建安風骨。藝苑卮言云。阮公詠懷。遠近之間。遇境卽際興窮卽止。坐不着論宗佳耳。人乃謂陳子昂勝之。何必子昂寧無感興乎哉。

詠懷詩三首

天地絪縕。元精代序。清陽曜靈。和風容與。明月

映天、甘露被宇、蓊鬱高松、猗那長楚、草蟲哀鳴、
鷦鷯振羽、感時興思、企首延佇於赫帝朝、伊衡
作輔、才非允文、器非經武、適彼沅湘、託分漁父、
優哉游哉、爰居爰處、

其二

月明星稀、天高氣寒、桂旗翠旌、珮玉鳴鸞、濯纓
醴泉、被服蕙蘭、思從二女、適彼湘沅、靈幽聽微、
誰觀玉顏、灼灼春華、綠葉含丹、日月逝矣、惜爾
華繁、

其三

清風蕭蕭脩夜漫漫。嘯歌傷懷。獨寐寤言。臨觴
拊膺。對食忘餐。世無萱草。令我哀歎。鳴鳥求友。
谷風刺愆。重華登庸。帝命凱元。鮑子傾蓋。仲父
佐桓。回濱嗟虞。敢不希顏。志存明規。匪慕彈冠。
我心伊何。其芳若蘭。

詠懷八十二首

顏延年云阮公身事亂朝
常恐遇禍因茲詠懷雖志

在譏刺而文多隱避百代之下難以情
測故粗明大意畧其幽旨也詩紀云阮
集傳之既久頗存譌闕校錄者往往肆
爲補綴作者之旨淆亂甚焉今以諸本

叅校其
義稍優

夜中不能寐起坐彈鳴琴薄帷鑒明月清風吹
我襟孤鴻號外野翔鳥鳴北林徘徊將何見憂
思獨傷心

其二

二妃遊江濱逍遙順風翔交甫懷環珮婉孌有
芬芳猗靡情歡愛千載不相忘傾城迷下蔡容
好結中腸感激生憂思萱草樹蘭房膏沐爲誰
施其雨怨朝陽如何金石交一旦更離傷

其三

嘉樹下成蹊。東園桃與李。秋風吹飛藿。零落從此始。繁華有憔悴。堂上生荆杞。驅馬舍之去。去上西山趾。一身不自保。何況戀妻子。凝霜被野。草歲暮亦云已。

其四

天馬出西北。由來從東道。春秋非有託。富貴焉常保。清露被皐蘭。凝霜霑野草。朝爲媚少年。夕暮成醜老。自非王子晉。誰能常美好。媚五臣作美

其五

平生少年時輕薄好絃歌西遊咸陽中趙李相
經過娛樂未終極白日忽蹉跎驅馬復來歸反
顧望三河黃金百鎰盡資用常苦多北臨太行

道失路將如何

丹鉛餘錄云阮籍詠懷詩西遊咸陽市趙李相經過顏延年以

爲趙飛燕李夫人劉會孟謂安知非實有此人不
必求其誰何也不詳詩意咸陽趙李謂游俠
近侍之儔漢谷永傳小臣趙李從微賤貴寵成
帝常與微行籍用趙李字正出此若如顏延年
之說趙飛燕李夫人豈可言經過如劉會孟言
當時實有此人唐王維詩亦有日夜經過趙李
家豈唐時亦實有此人乎乃知讀書不詳考深

云按漢書乃趙季李欸

其六

昔聞東陵瓜近在青門外連畛距阡陌子母相
鈎帶五色曜朝日嘉賓四面會膏火自煎熬多
財爲患害布衣可終身寵祿豈足賴

其七

炎暑惟茲夏三旬將欲移芳樹垂綠葉青雲自
逶迤四時更代謝日月遞參差徘徊空堂上悵
怛莫我知願覩卒歡好不見悲別離

參差一作差馳

其八

灼灼西隤日，餘光照我衣。
迴風吹四壁，寒鳥相因依。
周周尚銜羽，蛩蛩亦念飢。
如何當路子，磬折忘所歸。
豈爲夸譽名，憔悴使心悲。
甯與燕雀翔，不隨黃鵠飛。
黃鵠遊四海，中路將安歸。

譽一作與

其九

步出上東門，北望首陽岑。
下有采薇士，上有嘉樹林。
良辰在何許，凝霜霑衣襟。
寒風振山岡，玄雲起重陰。
鳴鴈飛南征，鷦鷯發哀音。
素質游商

聲懷愴傷我心

其十

北里多奇舞，濮上有微音。
輕薄閒遊子，俯仰乍浮沈。
捷徑從狹路，僂趨荒淫焉。
見王子喬，乘雲翔鄧林。
獨有延年術，可以慰我心。

以五臣作用

其十一

湛湛長江水，上有楓樹林。
皐蘭被徑路，青驪逝駸駸。
遠望令人悲，春氣感我心。
三楚多秀士，朝雲進荒淫。
朱華振芬芳，高蔡相追尋。
一爲黃雀

哀淚下誰能禁

其十二

昔日繁華子、安陵與龍陽、夭夭李花灼灼有
輝光、悅懌若九春、磬折似秋霜、流盼發姿媚、言
笑吐芬芳、攜手等歡愛、宿昔同衣裳、願爲雙飛
鳥、比翼共翱翔、丹青著明誓、永世不相忘、

其十三

登高臨四野、北望青山阿、松柏翳岡岑、飛鳥鳴
相過、感慨懷辛酸、怨毒常苦多、李公悲東門、蘇

子狹三河求仁自得仁豈復歎咨嗟

其十四

開秋兆涼氣蟋蟀鳴牀帷感物懷殷憂悄悄令
心悲多言焉所告繁辭將訴誰微風吹羅袂明
月耀清暉晨雞鳴高樹命駕起旋歸

其十五

昔年十四五志尚好詩書被褐懷珠玉顏閔相
與期開軒臨四野登高望所思邱墓蔽山岡萬
代同一時千秋萬歲後榮名安所之乃悟羨門

子噉噉令自蚩

其十六

徘徊蓬池上，還顧望大梁。
綠水揚洪波，曠野莽茫茫。
走獸交橫馳，飛鳥相隨翔。
是時鵠火中，日月正相望。
朔風厲嚴寒，陰氣下微霜。
羈旅無儔匹，俛仰懷哀傷。
小人計其功，君子道其常。
豈惜終憔悴，詠言著斯章。

其十七

獨坐空堂上，誰可與歡者。
出門臨永路，不見行

車馬登高望九州。悠悠分曠野。孤鳥西北飛。離
獸東南下。日暮思親友。晤言用自寫。

其十八

懸車在西南。羲和將欲傾。流光耀四海。忽忽至
夕冥。朝爲咸池暉。濛汜受其榮。豈知窮達士。一
死不再生。視彼茝李花。誰能久熒熒。君子在何
許。曠世未合并。瞻仰景山松。可以慰吾情。
曠世一作嘆息

其十九

阮步兵集

卷八

詩

七

西方有佳人，皎若白日光。被服纖羅衣，左右珮
雙璫。脩容耀姿美，順風振微芳。登高眺所思，舉
袂當朝陽。寄顏雲霄間，揮袖凌虛翔。飄飄恍惚
中，流眄顧我傍。悅懌未交接，晤言用感傷。當集作向

其二十

楊朱泣歧路，墨子悲染絲。揖讓長離別，飄飄難
與期。豈徒燕婉情，存亡誠有之。蕭索人所悲，禍
孽不可辭。趙女媚中山，謙柔愈見欺。嗟嗟塗上
士，何用自保持。

其二十一

於心懷寸陰、羲陽將欲冥、揮袂撫長劍、仰觀浮
雲征、雲間有玄鶴、抗志揚哀聲、一飛冲青天、曠
世不再鳴、豈與鶉鶉遊、連翩戲中庭、京師曹氏家藏阮步兵詩一卷、唐人所書、與世所傳多異、其一篇云、放心懷寸陰、羲和將欲冥、揮袂撫長劍、仰觀浮雲行、雲間有立鵠、抗首揚哀聲、一飛冲青天、疆世不再鳴、安與鶉鶉徒、翩翩戲中庭、孔宗翰亦有本、與此多同、

其二十二

夏后乘靈輿、夸父爲鄧林、存亡從變化、日月有

浮沈。鳳凰鳴參差。伶倫發其音。王子好簫管。世
世相追尋。誰言不可見。青鳥明我心。

其二十三

東南有射山。汾水出其陽。六龍服氣輿。雲蓋切
天綱。仙者四五人。逍遙晏蘭房。寢息一純和。呼
喻成露霜。沐浴丹淵中。炤耀日月光。豈安通靈
臺。游養去高翔。切一作覆
通集作邇

其二十四

殷憂令志結。休惕常若驚。逍遙未終晏。朱暉忽

西傾蟋蟀在戶牖。蟋蟀號中庭。心腸未相好。誰云亮我情。願爲雲間鳥。千里一哀鳴。三芝延瀛洲。遠遊可長生。

其二十五

拔劍臨白刃。安能相中傷。但畏工言子。稱我三江旁。飛泉流玉山。懸車棲扶桑。日月經千里。素風發微霜。勢路有窮達。咨嗟安可長。

勢外編作世

其二十六

朝登洪坡顛。日夕望西山。荆棘被原野。群鳥飛

翩翩鸞鷟時棲宿性命有自然建木誰能近射
于復嬋娟不見林中葛延蔓相勾連時集作特

其二十七

周鄭天下交街術當三河妖冶閼都子煥燿何
芬葩立髮發朱顏睇眄有光華傾城思一顧遺
視來相誇願爲三春遊朝陽忽蹉跎盛衰在須
臾離別將如何發一作照誇初學作週

其二十八

若花燿西海扶桑翳瀛洲日月經天塗明暗不

相讐窮達自有常得失又何求豈效路上童携
手共遨遊陰陽有變化誰云沈不浮朱鼈躍飛
泉夜飛過吳洲俛仰運天地再撫四海流繫累
名利場驚駿同一軌豈若遺耳目并遐去殷憂

花一作木西一作四讐集作伴

其二十九

昔余遊大梁登于黃華顛共工宅玄冥高臺造
青天幽荒邈悠悠悽愴懷所憐所憐者誰子明
察自照妍應龍沈冀州妖女不得眠肆侈陵世

俗。豈云永厥年。

自照妍一作應自然倭一作佞。詩話補遺云阮籍詩昔余遊

大梁登于黃華顛應龍沈冀州妖女不得眠按戰國策趙武靈西至河登黃華之上夢處女鼓琴歌詩因納吳廣女娃嬴孟姚其先七世而兆于簡子之夢及入宮而奪嫡亂國豈非妖女乎張平子應問曰女魃北而應龍翔合而觀之可見其微意蓋當是時魏明帝郭后毛后妬寵相殺。正類武靈王事故隱語怪說。亦春秋定哀多微辭意也。

其三十

驅車出門去意欲遠征行。征行安所如。肯弃夸與名。夸名不在已。但願適中情。單帷蔽皎日。高榭隔微聲。讒邪使交疏。浮雲令晝冥。嬋婉同衣

裳一顧傾人城。從容在一時。繁華不再榮。晨朝
奄復暮。不見所歡形。黃鳥東南飛。寄言謝友生。

其三十一

駕言發魏都。南向望吹臺。簫管有遺音。梁王安
在哉。戰士食糟糠。賢者處蒿萊。歌舞曲未終。秦
兵已復來。夾林非吾有。朱宮生塵埃。軍敗華陽

下身竟爲土灰。

世說新語云桓玄西下入石頭
外白司馬梁王奔叛時事形已

濟在平乘上。笳鼓並作。直高詠云。簫管有遺音。
梁王安在哉。文呂襍錄云。東京記。天清寺繁臺。
梁孝王按歌吹之臺。阮公詩云。駕言發魏都。南
向望吹臺。簫管有餘音。梁王安在哉。後有繁氏

居其側，里人呼爲繁臺。

其三十二

朝陽不再盛，白日忽西幽。去此若俯仰，如何似九秋。人生若塵露，天道邈悠悠。齊景升邱山，涕泗紛交流。孔聖臨長川，惜逝忽若浮。去者余不及，來者吾不畱。願登太華山，上與松子遊。漁父知世患，乘流泛輕舟。

其三十三

一日復一夕，一夕復一朝。顏色改平常，精神自

損消胸中懷，湯火變化故相招。萬事無窮極，知
謀苦不饒。但恐須臾間，魂氣隨風飄。終身履薄
冰，誰知我心焦。極一作理

其三十四

一日復一朝，一昏復一晨。容色改平常，精神自
飄淪。臨觴多哀楚，思我故時人。對酒不能言，悽
愴懷酸辛。願耕東臯陽，誰與守其真。愁苦在一
時，高行傷微身。曲直何所爲，龍蛇爲我隣。

其三十五

世務何縝紛，人道苦不遑。壯年以時逝，朝露待
太陽。願攬羲和轡，白日不移光。天階路殊絕，雲
漢邈無梁。濯髮暘谷濱，遠遊崑岳傍。登彼列仙
岵，採此秋蘭芳。時路鳥足爭，太極可翱翔。

其三十六

誰言萬事難，逍遙可終生。臨堂翳華樹，悠悠念
無形。彷徨思親友，倏忽復至冥。寄言東飛鳥，可
用慰我情。

其三十七

嘉時在今辰。零雨灑塵埃。臨路望所思。日夕復
不來。人情有感慨。蕩漾焉能排。揮涕懷哀傷。辛
酸誰語哉。

其三十八

炎光延萬里。洪川蕩湍瀨。彎弓掛扶桑。長劒倚
天外。泰山成砥礪。黃河爲裳帶。視彼莊周子。榮
枯何足賴。捐身弃中野。烏鳶作患害。豈若雄傑
士。功名從此大。

其三十九

壯士何慷慨，志欲威八荒。驅車遠行役，受命念
自忘。良弓挾烏號，明甲有精光。臨難不顧生，身
死魂飛揚。豈爲全軀士，救命爭戰場。忠爲百世
榮，義使令名彰。垂聲謝後世，氣節故有常。

其四十

混元生兩儀，四象運衡璣。敷日布炎精，素月垂
景暉。晷度有昭回，哀哉人命微。飄若風塵逝，忽
若慶雲晞。修齡適余願，光寵非已威。安期步天
路，松子與世違。焉得凌霄翼，飄飄登雲湄。嗟哉

尼父志何爲居九夷

其四十一

天網彌四野，六翮掩不舒。隨波紛綸客，汎汎若浮鳧。生命無期度，朝夕有不虞。列仙停脩齡，養志在沖虛。飄颻雲日間，邈與世路殊。榮名非已寶，聲色焉足娛。採藥無旋返，神仙志不符。逼此良可惑，令我久躊躇。

客集作落浮鳧一作鳧鷖

其四十二

王業須良輔，建功俟英雄。元凱康哉美，多士頌

聲隆陰陽有舛錯、日月不常融、天時有否泰、人事多盈沖、園綺遯南岳、伯陽隱西戎、保身念道真、寵耀焉足崇、人誰不善始、尠能尠厥終、休哉上世士、萬載垂清風、

其四十三

鴻鵠相隨飛、飛飛適荒裔、雙翮臨長風、須臾萬里逝、朝餐琅玕實、夕宿丹山際、抗身青雲中、網羅孰能制、豈與鄉曲士、携手共言誓、

從藝文
定正

其四十四

儔物終始殊，脩短各異方。琅玕生高山，芝英耀
朱堂。熒熒桃李花，成蹊將夭傷。焉敢希千術，三
春表微光。自非凌風樹，憔悴烏有常。
鳥一作要

其四十五

幽蘭不可珮，朱草爲誰榮。脩竹隱山陰，射干臨
增城。葛藟延幽谷，縣縣瓜瓞生。樂極消靈神，哀
深傷人情。竟知憂無益，豈若歸太清。

其四十六

鷺鳩飛桑榆，海鳥運天池。豈不識宏大，羽翼不

相宜招搖安可翔不若棲樹枝下集蓬艾間上

遊園圃籬但爾亦自足用子爲追隨

此首藝文類聚所載

與今本不同而義意近優觀李善文選注江文通按詠懷詩所引與藝文同亦一証也今從藝文定

正

其四十七

生命辰安在憂戚涕沾襟高鳥翔山岡鷺雀棲
下林青雲蔽前庭素琴悽我心崇山有鳴鶴豈
可相追尋

其四十八

鳴鳩嬉庭樹，焦明遊浮雲。焉見孤翔鳥，翩翩無匹羣。死生自然理，消散何續紛。

漢魏詩集合前爲一首

其四十九

步遊三衢旁，惆悵念所思。豈爲今朝見，恍惚誠有之。澤中生喬松，萬世未可期。高鳥摩天飛，凌雲共遊嬉。豈有孤行士，垂涕悲故時。

未一作安

其五十

清露爲凝霜，華草成蒿萊。誰云君子賢，明達安可能。棄雲招松喬，呼噏永矣哉。

其五十一

丹心失恩澤。重德喪所宜。善言焉可長。慈惠未
易施。不見南飛燕。羽翼正差池。高子怨新詩。三
閭悼乖離。何爲混沌氏。倏忽體貌隳。

其五十二

十日出暘谷。弭節馳萬里。經天耀四海。倏忽潛
濛汜。誰言焱炎久。遊沒何行俟。逝者豈長生。亦
去荆與杞。千載猶崇朝。一餐聊自已。是非得失
問焉足。相譏理計利。知術窮哀情。遽能止聊自已一

作百金子
遽一作克

其五十三

自然有成理，生死道無常。
智巧萬端出，大要不
易方。如何夸毘子，作色懷
驕腸。乘軒驅良馬，憑
几向膏粱。被服纖羅衣，
深榭設閒房。不見日夕
華，翩翩飛路傍。

其五十四

夸談快憤懣，情慵發煩心。
西北登不周，東南望
鄧林。曠野彌九州，崇山抗
高岑。一餐度萬世，千

歲再浮沈，誰云玉石同。淚下不可禁，情一作情

其五十五

人言願延年，延年欲焉之。黃鵠呼子安，千秋未

可期。獨坐山嵒中，惻愴懷所思。王子一何好，倚

靡相携持。悅懌猶今辰，計校在一時。置此明朝

事，日久將見欺。今本作潛見安能處山巖在一
置此明朝事日久將見欺

其五十六

貴賤在天命，窮達自有時。婉孌佞邪子，隨利來

相欺。孤思損惠施，但爲讒夫蚩。鵠鳴雲中，載

飛靡所期焉知傾側士一旦不可持

其五十七

驚風振四野、迴雲蔭堂隅、牀帷爲誰設、几杖爲誰扶、雖非明君子、豈聞桑與榆、世有此聾瞶、茫
茫將焉如、翩翩從風飛、悠悠去故居、離麾玉山
下、遺棄毀與譽

其五十八

危冠切浮雲、長劒出天外、細故何足慮、高度跨
一世、非子爲我御、逍遙遊荒裔、顧謝西王母、吾

將從此逝，豈與蓬戶士，彈琴誦言誓。

其五十九

河上有丈人，緯蕭弃明珠，甘彼藜藿食，樂是蓬蒿廬。豈效繽紛子，良馬騁龍輿。朝生衢路旁，夕瘞橫術隅。歡笑不終晏，俛仰復欷歔。鑒茲二三耆，憤懣從此餘。

其六十

儒者通六藝，立志不可干。違禮不爲動，非法不肯言。渴飲清泉流，饑食天一簞。歲時無以祀，衣

服常苦寒，屣履詠南風。縕袍笑華軒，信道守詩書。義不受一餐，烈烈襄貶辭。老氏用長歎，藝一作義

井一作甘

其六十一

少年學擊刺，妙伎過曲城。英風截雲霓，超世發奇聲。揮劍臨沙漠，飲馬九野垌。旗幟何翩翩，但聞金鼓鳴。軍旅令人悲，烈烈有哀情。念我平常

時，悔恨從此生。

刺集作劍

其六十二

平晝整衣冠，思見客與賓。賓客者誰子，倏忽若
飛塵。裳衣佩雲氣，言語究靈神。須臾相背弃，何
時見斯人。

其六十三

多慮令志散，寂寞使心憂。翱翔觀陂澤，撫劍登
輕舟。但願長閒暇，後歲復來遊。

陂一作彼

其六十四

朝出上東門，遙望首陽基。松柏鬱森沈，鵬黃相
與嬉。逍遙九曲間，徘徊欲何之。念我平居時，鬱

然思妖姬

其六十五

王子十五年遊衍伊洛濱。朱顏茂春華。辯慧懷
清真焉。見浮邱公。舉手謝時人。輕蕩易恍惚。飄
飄弃其身。飛飛鳴且翔。揮翼且酸辛。

其六十六

塞門不可出海水焉。可浮朱明。奄昧獨無不相。
見侯持瓜思東陵。黃雀誠獨羞。失勢在須臾。帶
劍上吾邱。悼彼桑林子。涕下自交流。假藥汙渭

間、鞍馬去行遊、

塞一作寒時事漢武帝崩後忽見形謂陵

丹鉛餘錄云漢武

令薛平曰、我雖失勢、猶爲汝君、奈何、令吏卒上

吾陵磨劍乎、因不見、推陵旁果有方石、可以爲

礪、吏卒嘗盜磨刀劍、霍光欲斬之、張安世曰、神

道茫昧、不宜爲法、故阮公詠懷詩曰、失勢在須

史帶劍

上吾邱

其六十七

洪生資制度、被服止有常、尊卑設次序、事物齊

紀綱、容飾整顏色、磬折執圭璋、堂上置玄酒、室

中盛稻粱、外厲貞素談、戶內滅芬芳、放口從衷

出、復說道義方、委曲周旋儀、姿態愁我腸、

其六十八

北臨乾昧谿、西行遊少任、遙顧望天津、駘蕩樂
我心、綺靡存亾門、一遊不再尋、儻遇晨風鳥、飛
駕出南林、漭漾瑤光中、忽忽肆荒淫、休息晏清
都、超世又誰禁、南一作東超世又誰禁一作起坐復誰禁

其六十九

人知結交易、交友誠獨難、險路多疑惑、明珠未
可于、彼求饗太牢、我欲并一餐、損益生怨毒、咄
咄復何言。

其七十

有悲則有情。無悲亦無思。苟非嬰網罟。何必萬
里畿。翔風拂重霄。慶雲招所晞。灰心寄枯宅。曷
顧人間姿。始得忘我難。焉知嘿自遺。無悲亦無
思集作無
情亦無悲
始集作曲

其七十一

木槿榮邱墓。煌煌有光色。白日頽林中。翩翩零
路側。蟋蟀吟戶牖。蟪蛄鳴荆棘。蜉蝣玩三朝。采
采修羽翼。衣裳爲誰施。俛仰自收拭。生命幾何

時慷慨各努力

其七十二

修塗馳軒車。長川載輕舠。性命豈自然。勢路有所繇。高名令志惑。重利使心憂。親昵懷反側。骨肉還相讐。更希毀珠玉。可用登遨遊。

其七十三

橫術有奇士。黃駿服其箱。朝起瀛洲野。日久宿明光。再撫四海外。羽翼自飛揚。去置世上事。豈足愁我腸。一去長離絕。千歲復相望。

其七十四

猗歟上世士，恬淡志安貧。
季葉道陵遲，馳驚紛垢塵。
寧子豈不類，揚歌誰肯殉。
棲棲非我偶，徨徨非已倫。
咄嗟榮辱事，去來味道真。
道真信可娛，清潔存精神。
巢由抗高節，從此適河濱。

殉一作詢

其七十五

梁東有芳草，一朝再三榮。
色容豔姿美，光華耀傾城。
豈爲明哲士，妖蠱諂媚生。
輕薄在一時，安知百世名。
路端便媚子，但恐日月傾。
焉見冥靈

木悠悠竟無形

其七十六

秋駕安可學，東野窮路旁。
綸深魚淵潛，矰設鳥高翔。
汎汎乘輕舟，演漾靡所望。
吹噓誰以益，江湖相捐忘。
都冶難爲顏，修容是我常。
茲年在松喬，恍惚誠未央。
秋駕作稅駕者誤按莊子逸篇尹儒學御三年而無所得夜夢受秋駕明日往朝師師曰今將教子以秋駕註曰秋駕法駕

其七十七

咄嗟行至老，僂俛常苦憂。
臨川羨洪波，同始異

支流百年何足言，但苦怨與讐讐。怨者誰子耳，目還相羞聲色爲胡越。人情自逼迢，招彼立通土。去來歸羨遊，

其七十八

昔有神仙士，乃處射山阿。乘雲御飛龍，噓噏噉瓊華。可聞不可見，慷慨歎咨嗟。自傷非疇類，愁苦來相加。下學而上達，忽忽將如何。噉音機小食也

其七十九

林中有奇鳥，自言是鳳皇。清朝飲醴泉，日夕棲

山岡高鳴，徹九州，延頸望八荒，適逢商風起，羽翼自摧藏，一去崑崙西，何時復廻翔，但恨處非立，愴恨使心傷。

其八十

出門望佳人，佳人豈在茲，三山招松喬，萬世誰與期，存亡有長短，慷慨將焉知，忽忽朝日隕，行將何之，不見入秋草，摧折在今時，亡一作日

其八十一

昔有神仙者，羨門及松喬，喻習九陽間，升近嘒

陽方集 卷八
雲霄人生樂長久百年自言遼白日隕隅谷一
久不再朝豈若遣世物登明遂飄飄

其八十二

墓前熒熒者木槿耀朱華榮好未終朝車颺隕
其葩豈若西山草琅玕與丹禾垂影臨增城餘
光照九阿甯微少年子日夕難咨嗟

采薪者歌

日沒不周西月出丹淵中陽精蔽不見陰光代
爲雄亭亭在須臾厭厭將復隆離合雲霧兮往

來如飄風。富貴俯仰間。貧賤何必終留侯。起亡
虜。威武赫荒夷。邵平封東陵。一旦爲布衣。枝葉
托根柢。死生同盛衰。得志從命升。失勢與時墮。
寒暑代征邁。變化更相推。禍福無常主。何憂身
無歸。推茲繇斯道。負薪又何哀。

大人先生歌

天地解兮。六合開。星辰隕兮。日月頽。我騰而上。
將何懷。

阮步兵集

卷全

全

本傳

阮籍字嗣宗陳留尉氏人也父瑀魏丞相掾知名於世籍容貌瓌傑志氣宏放傲然獨得任性不羈而喜怒不形於色或閉戶視書累月不出或登臨山水經日忘歸博覽群籍尤好莊老嗜酒能嘯善彈琴當其得意忽忘形骸時人多謂之癡惟族兄文業每歎服之以爲勝已由是咸共稱異籍嘗隨叔父至東郡兖州刺史王昶請與相見終日不聞一言自以不能測太尉蔣濟

聞其有雋才而辟之籍詣都亭奏記初濟恐籍
不至得記欣然遣卒迎之而籍已去濟大怒於
是鄉親共喻之乃就吏後謝病歸復爲尙書郎
少時又以病免及曹爽輔政召爲叅軍籍因以
疾辭屏於田里歲餘而爽誅時人服其遠識宣
帝爲太傅命籍爲從事中郎及帝崩復爲景帝
大司馬從事中郎高貴鄉公卽位封關内侯徙
散騎常侍籍本有濟世志屬魏晉之際天下多
故名士少有全者籍由是不與世事遂酣飲爲

常文帝初欲爲武帝求婚於籍籍醉六十日不
得言而止鍾會數以時事問之欲因其可否而
致之罪皆以酣醉獲免及文帝輔政籍嘗從容
言於帝曰籍平生曾遊東平樂其風土帝大悅
卽拜東平相籍乘驢到郡壞府舍屏鄣使內外
相望法令清簡旬日而還帝引爲大將軍從事
中郎有司言有子殺母者籍曰嘻殺父乃可至
殺母乎坐者怪其失言帝曰殺父天下之極惡
而以爲可乎籍曰禽獸知母而不知父殺父禽

獸之類也。殺母禽獸之不若衆乃悅服。籍聞步兵厨營人善釀。有貯酒三百斛。乃求爲步兵校尉。遺落世事。雖去佐職。恒遊府內。朝宴必與焉。會帝讓九錫。公卿將勸進。使籍爲其辭。籍沉醉忘作。臨詣府使取之。見籍方據按醉眠。使者以告。籍便書。按使寫之。無所改竄。辭甚清壯。爲時所重。籍雖不拘禮教。然發言立遠。口不臧否人物。性至孝。母終。正與人圍碁。對者求止。籍留與決賭。旣而飲酒二斗。舉聲一號。吐血數升。及將

葬食一蒸肫飲二斗酒然後臨訣直言窮矣舉
聲一號因又吐血數升毀瘠骨立殆致滅性裴
楷往弔之籍散髮箕踞醉而直視楷弔唁畢便
去或問楷凡弔者主哭客乃爲禮籍旣不哭君
何爲哭楷曰阮籍旣方外之士故不崇禮典我
俗中之士故以軌儀自居時人歎爲兩得籍又
能爲青白眼見禮俗之士以白眼對之及嵇喜
來弔籍作白眼喜不懌而退喜弟康聞之乃齎
酒挾琴造焉籍大悅乃見青眼由是禮法之士

疾之若讐而帝每保護之籍嫂嘗歸甯籍相見
與別或譏之籍曰禮豈爲我設耶鄰家少婦有
美色當鑪沽酒籍常詣婦飲醉便臥其側籍旣
不自嫌其夫察之亦不疑也兵家女有才色未
嫁而死籍不識其父兄徑往哭盡哀而還其外
坦蕩而內淳至皆此類也時率意獨駕不由徑
路車迹所窮輒慟哭而反嘗登廣武觀楚漢戰
處歎曰時無英雄使豎子成名登武牢山望京
邑而歎於是賦豪傑詩景元四年冬卒時年五

十四籍能屬文。初不留思作詠懷詩八十餘篇。爲世所重。著達莊論。叙無爲之貴。文多不錄。籍嘗於蘇門山遇孫登。與商畧終古及栖神道氣之術。登皆不應。籍因長嘯而退。至半嶺聞有聲若鸞鳳之音響乎巖谷。乃登之嘯也。遂歸著大人先生傳。其畧曰。世之所謂君子。惟法是脩。惟禮是克。手執圭璧。足履繩墨。行欲爲目前檢。言欲爲無窮則。少稱鄉黨。長聞鄰國。上欲圖三公。下不失九州牧。獨不見羣蝨之處禪中。逃乎深

縫。匿乎壤絮。自以爲吉兆也。行不敢離縫際。動不敢出禪襜。自以爲得繩墨也。然炎邱火流。焦邑滅都。群蝨處於禪中而不能出也。君子之處域內。何異夫蝨之處禪中乎。此亦籍之胷懷本趣也。子渾字長成。有父風。少慕通達。不飾小節。籍謂曰。仲容已豫吾此流。汝不得復爾。太康中爲太子庶子。

阮步兵集終



